

ANUGERAH SUKAN SINGAPURA 2017

Tiga pesilat dicalon dalam senarai utama

► ANWAR YAHYA
anwar@sph.com.sg

KECEMERLANGAN pesilat negara dalam Kejohanan Dunia yang berlangsung di Bali pada hujung tahun lalu diiktiraf apabila tiga daripada mereka dicalonkan bagi Anugerah Sukan Singapura 2017 – anugerah sukan tertinggi negara ini.

Senarai akhir atlit itu – termasuk bagi dua anugerah utama, Olahragawan dan Olahragawati Terbaik Singapura – diumumkan Majlis Olimpik Kebangsaan Singapura (SNOC) semalam.

Salah seorang daripada juara dunia silat itu, Muhammad Shakir Juanda, 29 tahun, akan bersaing bagi anugerah Olahragawan Terbaik, bersama-sama dua jaguh sukan lain – juara renang Olimpik Joseph Schooling dan bintang sukan *cue* Peter Gilchrist.

Rakan Shakir yang turut bergelar juara dunia, Sheik Farhan Sheik Alau'ddin, 20 tahun, pula dicalonkan bagi Anugerah Atlit-Pelajar Terbaik bersama-sama Bernie Chin (kapal layar) dan Malcolm Lai (wushu).

Pencapaian Nurul Suhaila Mohd Saiful, 22 tahun, yang membawa pulang pingat gangsa daripada Kejohanan Dunia di Bali itu, turut diiktiraf apabila beliau dicalonkan buat kali pertama bagi Anugerah Olahragawati Terbaik bersama-sama tiga rakan atlit lain – Feng Tianwei (tenis meja), New Hui Fen (bowling) dan Jasmine Ser (menembak).

Calon bagi Anugerah Atlit-Pelajar Perempuan Terbaik pula akan menyaksikan saingan tiga penjurua antara Amabel Chua (bowling), Lau Ywen (lawan pedang) dan Cindy Lim (wushu).

Hanya satu calon dikemukakan bagi Anugerah Jurulatih Terbaik – Eddie Reese (renang).

Mengulas pengiktirafan yang diberikan kepada atlitnya, Ketua Pegawai Eksekutif (CEO) Persekutuan Silat Singapura (Persisi),



KEHEBATAN DIKTIKRAF: Bergelar juara dunia silat, Muhammad Shakir Juanda (*kanan*) dan Sheik Farhan Sheik Alau'ddin, turut tampil antara calon dalam majlis Anugerah Sukan Singapura yang akan berlangsung bulan depan. – Foto-foto fail

Sheik Alau'ddin Yacoob Marican, berkata: "Tentu sekali ia satu kebanggaan... melihat sehingga tiga pesilat dicalonkan bagi anugerah berprestij ini.

"Kami bersyukur dan berharap pencapaian ini menjadi motivasi kepada rakan-rakan lain agar terus mengharumkan nama negara... pencalonan ini juga menjadi pendorong bagi semua anggota keluarga besar silat termasuk jurulatih dan kakitangan lain."

Dianjurkan SNOC dan agensi sukan negara, Sport Singapore (SportSG), dengan sokongan Tote Board Group, majlis anugerah

tahun ini akan menyaksikan atlit dan calon daripada 10 kategori diiktiraf.

Anugerah kecemerlangan turut akan diberikan kepada atlit individu dan berpasukan dalam kategori senior.

Mengulas pemilihan calon bagi anugerah kali ini, pengerusi jawatankuasa penganjur majlis anugerah, Low Teo Ping, pula berkata:

"Kami bangga dengan prestasi atlit Team Singapore yang telah mencapai tahap tinggi dalam kecemerlangan sukan tahun lalu.

"Pencapaian hebat mereka dalam Sukan Olimpik Rio 2016 dan kejohanan dunia dalam bowling, sukan *cue*, lawan pedang,



TURUT DICALONKAN: Nurul Suhaila Mohd Saiful dicalonkan buat kali pertama dalam kategori Olahragawati Terbaik.

silat dan wushu mengagumkan ramai warga Singapura dan wajar diiktiraf dalam majlis anugerah ini nanti.

"Sambutan tahun ini juga bertepatan dengan ulang tahun ke-70 pergerakan Olimpik dan kami berharap generasi atlit masa depan dapat terus mencatatkan kejayaan lebih besar di pentas sukan."

Satu kategori anugerah baru diperkenalkan tahun ini – Foto Sukan Terbaik – yang bertujuan mengiktiraf kecemerlangan dalam fotografi sukan dan menggalak lebih ramai mencurahkan diri dalam bidang ini.

Majlis anugerah gilang-gemilang ini akan berlangsung pada 8 Ogos.

SENARAI CALON

- 1. OLAHRAGAWAN TERBAIK**
 - Joseph Schooling (renang)
 - Peter Gilchrist (sukan *cue*)
 - Muhammad Shakir Juanda (silat)
- 2. OLAHRAGAWATI TERBAIK**
 - Feng Tianwei (tenis meja)
 - New Hui Fen (bowling)
 - Nurul Suhaila Mohd Saiful (silat)
 - Jasmine Ser (menembak)
- 3. ATLIT-PELAJAR LELAKI TERBAIK**
 - Bernie Chin (kapal layar)
 - Malcolm Lai (wushu)
 - Sheik Farhan Sheik Alau'ddin (silat)
- 4. ATLIT-PELAJAR PEREMPUAN TERBAIK**
 - Amabel Chua (bowling)
 - Lau Ywen (lawan pedang)
 - Cindy Lim (wushu)
- 5. JURULATIH TERBAIK**
 - Eddie Reese (renang)
- 6. PASUKAN TERBAIK**
 - Kanu wanita K2 500m (Stephanie Chen & Geraldine Lee)
 - Wushu 'Duilian' wanita (Fung Hui Xin & Emily Sin)
- 7. ACARA SUKAN TERBAIK (SETEMPAT)**
 - Great Eastern Women's Run 2016
 - Mission Foods Nations Cup 2016
 - OSIM Sundown Marathon 2016
 - Standard Chartered Marathon Singapore 2016
- 8. ACARA SUKAN TERBAIK (ANTARABANGSA)**
 - Tennis BNP Paribas WTA Finals
 - FINA/airweave Swimming World Cup 2016
 - HSBC Singapore Rugby 7s 2016
- 9. LAPORAN SUKAN PALING INSPIRASI**
 - tiga calon
- 10. FOTO SUKAN TERBAIK**
 - dua calon